



**GIUSEPPE CABIZZOSU**

BIBLIOTECA

[www.giusepecabizzosu.it](http://www.giusepecabizzosu.it)

# Pregadorias II

**Canti sacri e preghiere  
in lingua sarda**





GIUSEPPE CABIZZOSU  
BIBLIOTECA  
[www.giusepecabizzosu.it](http://www.giusepecabizzosu.it)

# Pregadorias II

## Canti sacri e preghiere

Canti sacri e preghiere in lingua sarda.



## **Ave Maria**

Deus Ti sàlvet, Maria,  
piena de grascia;  
su Signore est cun tègus:  
beneitta ses Tue trà tottu sas fèminas,  
e beneittu est su fruttu  
de sas intràgnas tuas, Gèsus.  
Santa Maria, Mama 'e Deus,  
prèga pro nois àteros peccadores,  
como et in s'ora de sa morte nostra.  
Am' in Gèsu.

## **Deus ti salvet, Maria**

Deus Ti sàlvet, Maria,  
chi ses de gràssias piena,  
de gràssias ses sa vena,  
e sa corrente.

Su Deus Onnipotente  
cun tègus est istàdu,  
pro chi T'hat preservàdu,  
Immaculada.

Beneitta e laudàda,  
subra tottu, gloriosa,  
ses Mama, Fiza et  
Isposa, de su Signore.

Beneittu su fiore  
e su fruttu de su sinu,  
Gesùs, fiore divinu,  
Signore nostru.

Pregàde a Fizu ostru  
pro nois, sos peccadores,  
chi totu sos errores  
nos perdònet.

E sa gràscia nos dònet,  
in vida et in sa morte,  
e sa diciòsa sorte,  
in Paradisu.  
Amen.

## **Deus ti salvet, Reina**

Deus ti sàlvet, Rèina,  
mama universale,  
giughide ogni mortale  
a su Paradisu.

Gioia sezis e risu  
de sos isconsolàdos,  
e de sos tribulàdos  
sa isperanzia.

A Bois cun istanzia  
gementes suspiràmus  
e mama Bos giamàmus  
amorosa.

Benigna e piedòsa  
a tottu nos miràde,  
a fizu ostru narade  
chi nos perdònet.

E sa grascia nos donet  
de andare a sa gloria,  
est custa sa vittoria  
chi pregàmus.



In Bois cunfidamus  
chi fizos bostros sèmus,  
e totu nos salvèmus  
eternamente.

## Ave Mama de Deu

Ave, Mama de Dèu,  
de chelos sovràna,  
de grascia funtàna,  
candidu ispàntu.

Cun maternu incantu  
Gesùs has ninnàdu,  
carignos l'has dàdu,  
prènda de amàre.

L'as bidu indorare  
de rajos sos coros,  
mudènde in tesoros  
sas ràncidas nues.

Sùffris, ma non rùes,  
Mama de dolore,  
cando, Redentore  
l'ides isvenàdu.

L'has poi affestàdu  
binchidòre 'e morte,  
giuttènde in corte  
santos et ànghelos.

Como ch'in sos chelos  
ses Rejna digna,  
ispàrghe in Sardigna,  
grascia e amore.

## Nàschida de Maria Santissima

Grascias a s'altu Signore  
fètat dogni gerarchìa,  
pro ch'est nàschida Maria  
Mama de su Redentore.

Nàschit lughes ostendhènde  
s'aurora misteriosa,  
cale vera prodigiosa  
portentos pronostichènde,  
beneficios derramènde  
a s'afflittu peccadòre.

Nàschit giocunda e ufàna  
formend'in rajos donòsos  
crepùsculos luminosos  
a sa redenzione umana,  
e cun grazia soberàna  
a s'alma offèrit favore.

Nàschet sa femina forte  
chi Salomone chirchèsit;  
nàschit sa chi reparèsit  
sos istràgos de sa morte;  
nàschit dae s'eterna corte  
su doràdu risplendòre.

Nàschit sa fiza istimàda  
de s'Eternu Criadòre,  
de su beru Redentòre  
nàschit sa Mama ispettàda,  
e nàschit s'isposa amàda  
de s'altu Consoladòre.

Nàschit sa vàra sagràda  
de su truncu de Gessè;  
nàschit de s'Eternu Rè  
sa prènda piùs prezziàda,  
sunamìtis trasformàda  
cun disfrassos de amore

Nàschit s'aquila reale  
chi cun modos peregrinos  
pònet sos fizos bighinos  
a su Sole celestiale;  
nàschit sa mananziàle  
de donos de su Signore.

Nàschit sa Rachèl ermòsa  
e nàschit Lìa fecunda,  
e nàschit Sara giocunda,  
nàschit sa Giaèl donòsa,  
sa Dèbora poderòsa,  
sa Giuditta de piùs valore.

Nàschit s'Ester figuràda  
nàschit Ruth ossechiòsa,  
e nàschit sa menzus rosa  
ch'est in Gerico piantàda,  
e nàschit predestinàda

Nàschit òe s'Ave Maria  
piena de grascia et amore,  
ca cun Issa est su Signore  
in perpetua cumpagnia;  
su chelu e terra a porfia  
tribùtan gloria et onore.

Nàschit su cuntentu e gòsu,  
nàschit s'arrìmu et ampàru;  
nàschit s'azùdu e repàru  
nàschit s'allìviu e repòsu;  
patrociniu poderosu  
de su tristu peccadore.

Arrìvat a portu sa nave  
de su menzus mercadèri,  
ch'in movimentu lezèru nos  
giughet pane suave,  
còttu cun misteriu grave  
in fiàmas de finu amore.

Nàschit de s'alta zittàde  
sa torrente cristallina;  
nàschit s'Infante divina  
de sa Santa Trinitade;  
de s'umana libertade  
nàschit su brillante albòre.

## De Cristos lughe increada

De Cristos lughe increada  
sezis dorada aurora,  
amparadenos, Segnora  
Virgine de s' Annunziata.

Da eterno fit previstu  
in sa corte celestiale  
esser Bois mama tale  
de su fizu Gesu Cristu  
pro tenner s'omine tristu  
reparu a sa prima errada.

Profetizat Daniele  
su tempus chi de' restare  
chen' ancora s'incarnare  
su divinu Emmanuele  
e, cumpridu, Gabriele  
Bos benit cun s'imbsciada.

«Ave» bos narat, «Maria  
totu de grassias piena,  
casta e candida sussena  
de chelu e terra allegria,  
de Cristos, veru messia,  
sezis mama signalada».



Comente podet restare  
Mama chen'haer consorte,  
si de sa celeste corte  
non benit pro fecundare  
restende virgine e dare  
lughe tantu antizipada?

Su Ispiritu divinu  
in Bois det operare  
custu partu singolare  
e misteriu peregrinu!  
restende de Deus trinu  
Sacradu templu e morada.

Su celeste ambasciadore  
custa nova Bos portesit :  
abbenes chi Bos turbesit,  
su peregrinu favore  
azzettades cun amore  
umilmente rassegnada.

“Ecce” nades azzettende  
de mama sa dignitade!  
E vestit s'immensu e grande  
sa mortale umanidade,  
e restat sa magestade  
Infinita, abbreviada.

Operadu est su misteriu,  
umanadu est su divinu,  
restat s'omine mischinu  
liberu de cattiveriu:  
in Bois hat refrigeriu  
s'alma aflitta, isconsolada.  
tantu a Deus aggradesit  
sa umilidade Bostra  
chi custa natura nostra  
cun Issu s'imparentesit:  
et in s'omine logresit  
sorte e dicia mezorada.

Sezis de grascias mare,  
sezis de grascias mina,  
sezis cura et meighina  
in portentos singulare :  
sezis norte pro ghiare  
s'anima ch'andat errada.

In custu templu sacradu  
de probativa piscina  
incontrat sa meighina  
su afflittu, su bardadu,  
su tristu e necessitadu  
consighit dicia colmada.

In custos vallos remotos  
dispensade sos favores  
a sos tristos peccadores  
chi cun supplicas e botos  
benin umiles devotos  
pro esser da totus adorada.

In chelu e terra esaltada  
soberana imperadora,  
amparade nos, Signora,  
Virgine de s' Annunziata.

## **Salve, salve o purissima**

Salve, salve o purissima,  
sola culumba candida,  
sempre intatta e libera  
de originale maccula.

Non umbra est in te, Virgine  
inter feminas unica,  
de lesione adamitica  
e de culpa primaria.

Perfetta luna splendida,  
et Aurora prenunzia  
de sole de giustiscia  
in terrenale machina,  
nostras tenebras dissipa  
cun serena presenza,  
purifica et illumina  
tantas oscuras animas.

Mistica Rosa in Gerico  
pro candore e fragranzia,  
e pro amabile purpura  
cun corona de grascia,

umanas spinas mitiga  
e penas cun clementia,  
e preserva nos timidos  
de rigida giustiscia.

Palma in Cades simbolica,  
santos e giustos superas,  
coros puru angelicos  
Cun suprema eccellenzia:

Tua est nostra vittoria  
de tentazione varia,  
si superamus debiles  
in terra, valle misera.

Divina arca pacifica,  
in te Messias abitat,  
chi naufragos nos liberat,  
e nos salvat in patria.

O gloriosa femina,  
gemma nostra onorifica,  
Margarita evangelica  
e corona augustissima,

Maria, mare in grascia,  
mare in misericordia,  
summa est nostra miseria,  
dona nos grascia e gloria.

Trina persona in unica,  
divina eterna essenza pro te  
vivat cun laude et regnet,  
o Purissima.  
Amen.

## **SS. nòmen de Maria**

Si solamente invocàdu  
càusat gòsu et allegria,  
siat semper laudàdu  
su nòmene de Maria.

Est nòmene in veridàde  
de s'altu Empìreu benìdu,  
dae su tesoro estraìdu  
de s'immensa deidàde,  
donu d'eterna bontàde,  
celeste in terra allegrìa.

Giòachin lu pronunziàda  
de Anna isposu fidele,  
lu salùdat Gabriele  
in sa famosa imbasciàda,  
su criàdu l'iscurtada  
cal'aurora, amiga e pia.

Tottu t'adòrat su mundu  
cun giubilu e cun cuntentu,  
solu càusat sentimentu  
a s'infernale profundu,  
ca de s'ispiritu immundu  
triùnfat cun galanìa.

In dogni tentassione  
chie chèret triunfare,  
cun firma divozione  
a Maria hat invocare;  
Maria l'hat a salvare  
cun materna cortesia.

De custu Virgine pura  
su nòmen altu eccellente  
in totu tenet presente,  
poìte in coro est ternùra,  
poìte in limba est dulzura,  
in orijas melodìa.

Rèndet sa mente serena  
e dat consòlu a su coro,  
de grascia a s'alma est tesoro  
de benes continua vena,  
in custa vida de pena  
mìtigat dogni agonia.

In dogni male e dolènzia  
prontu a Maria recùrre.  
Issa est viva e forte tùrre,  
Issa est pronta provvidenzia,  
Issa est Mama de clemenzia,  
in fortuna e maladià.



Procùra cun divozione  
de ti pònner e cun gustu  
de nòmene tantu augustu  
bàscia sa invocazione,  
pro ch'in dogni afflizione  
ti liberet a porfia.

## **Deus bos salvet, Signora**

Deus bos salvet, Signora,  
de su chelu e de sa terra  
sa grascia in Bois s'inserrat  
abbundante

Virgine sempr'e costante,  
de sas virgines reina,  
istella già matutina  
illustr'e serena.

Maria 'e grascia piena,  
gioia preziosa e rara,  
chen'umbra e nue, clara  
lughe divina.

Già rutos in tanta ruina  
pro nostra fragilidade  
succursu nos implorade  
in custa vida.

Già ch'istezis elegia  
dai s'eternu consizu  
pro esser mama 'e fizu  
in terra incarnadu.

Restat su mund'ispantadu,  
chelu, terra e mare  
bidendebos isposare  
immaculada.

Virgine in Chel'elevada,  
distinta, sabia e bella,  
sacrariu, dom'e capella  
de su Signore.

Sagrada mensa 'e amore  
vivet pro amore cuntentu  
pro zibu e nutrimentu  
de sos elettos.

Pro sos divinos decretos  
istezis gai preservada  
in esser santificada  
divinamente.

Mama de s'Onnipotente  
implorat pro chie l'amat,  
de Giacob istella e mama  
de sos viventes.

Amparu 'e penitentes  
de s'umanu intendimentu,  
in Gesus e in Bois s'intentu  
istade ogn'ora.

Attiva pius protettora  
de s' eserzitu pius duru,  
refugiu e portu seguru  
de sos cristianos.

S'aggiudu 'Ostru imploramus,  
arca de vera unione,  
ispiju de ammirascione  
su piu perfettu.

Iride bella ch'in effettu  
annunziat serenidade,  
de sa pius minore edade  
miracolosa.

Fiamma meravigliosa  
azzendet in ogni logu  
sagradu ardente fogu  
ne diminuida.

Sa vara gai fiorida  
figurada in s'antigu Arone  
misteriu chi Gedeone  
non cumprendiat.

Opportunu meda fiat  
dispost'e cumbeniente  
su fizu onnipotente  
de amore morit tantu.

Sa mama 'e puru piantu  
chi Eva a nois causesit,  
isse chi gai decretesit  
su reu haer liberadu.

Virgine chene peccadu  
Reina de magestade,  
templu de sa Trinitade  
chi veneramus.

In Bois nos cunfidamus,  
candore chi edificat,  
chi s'anima purificat  
de sos cunvertidos.

Consolu de affliggidos,  
portu de felizzidade,  
oraculu de bonidade  
e de clemenzia.

Modellu de continenza,  
de castidade e puresa,  
perfettissima in candidesa  
et edificascione.

Terra 'e benediscione  
chi sa divinidade reale  
ei s'istirpe sazzerdotale  
hat cunservada.

Istezis già nomenada  
zittade sa pius eminente,  
bella porta de Oriente  
favoressida.

## O amabile Maria

O amabile Maria  
gioia, allegria e cuntentu  
deo cherzo ogni momentu  
su nomene Tou giamare

Su nomene Tou invocare  
bramo dolente et afflittu  
custu nomene beneditu  
ch'est a Deus tantu azzettu.

In su coro et in su pettu  
lu tenzo sempre imprimidu.  
nomene santu e riveridu  
vida de s'anima mia.

Sempre happeo a giamare Maria  
cando ispuntat s'aurora  
l'invoco e la giamo ancora  
cando su sole tramontat

E cantos momentos contant  
s'annu, su mese, sa die  
semper happeo a giamare a tie  
cun boghes dulches e caras.

In su coro et in sa laras  
su nomene Tou happe a tenner,  
no mai m'happe a cuntenner  
de ti giamare, o Maria.

Si afflitta est s'anima mia  
in affannos et in penas  
si de culpa sas cadenas  
m'istringhent troppu su coro;

su numen Tou imploro;  
e det frimmare ogni male  
si s'inimigu infernale  
m'istat in giru tentende.

Deo a Maria giamende  
l'happe a fagher a fuire  
si andat a mi pessighire  
su mundu postu in malignu.

Su nomene  
Tou benignu  
mi det servire a difesa  
cale si siat pretesa  
mi facat sa passione.



O mala suggestione  
devo a Maria giamare  
mi det issa liberare  
dae dogni pena e fastizu.

Issa est Mama e deo fizu  
o ite bella isperanzia  
tenzo tanta cunfidenza  
chi invochendela cumpuntu;

De sa vida in ogni puntu  
fina a s'ultim'agonia  
nende: "Maria, Maria" ,  
s'anima det ispirare.

L'a det issa presentare  
a su Deus Unu e trinu  
nende a su Fizu divinu:  
salva cust'anima, est mia

C'hat invocadu a Maria  
in totta sa vida sua.  
custa est sa gloria Tua  
custa est s'allegria mia  
o amabile Maria.  
o amabile Maria.

## O Virgine gloriosa

O Virgine gloriosa  
sublime in su firmamentu  
chie t'hat criadu est cuntentu  
ca l'allattesti amorosa.

Su ch'Eva trista fattesit  
cun universale luttu,  
cun Gesus, divinu fruttu,  
Maria lu reparesit

Vida, veridade e via  
est Gesus, narat sa fide.  
Rendentos, applaudide  
a su Fizu de Maria.

O Gesus, ti siat gloria  
dae Maria naschisti,  
e s'omine redimisti  
cun esultante vittoria

Maria, mama de grascia  
e dulce mama e clemenzia  
prestami tue assistenza  
in s'ora de sa digrascia.

Cumprimi dogni disizu  
e gloria siat intantu  
a su Babbu e a su Fizu  
e a s'Ispiritu Santu.

## **Laudes a Maria Santissima**

Cun tot' allegria  
de coro adorada  
beneitta, laudada  
siat sempre Maria.

Maria est su lizu  
sa mistica rosa,  
tot' affettuosa  
cun Gjesus su fizu,  
mama de consìzu  
dae tot' invocada.  
Beneitta, laudada  
siat sempre Maria.

In chelu lughente  
Maria est s'istella  
tota pura e bella  
tota risplendente  
chi ghiat sa zente  
pro esser salvada.  
Beneitta, laudada  
siat sempre Maria.

Arca de difesa  
portu de salude,  
amore e virtude  
candore e puresa,  
tota teneresa  
appassionada.

De ogni credente  
iss'est s'isperanzia:  
firmesa e costanzia  
de su penitente;  
benigna, indulgente,  
serena e placada  
beneitta, laudada  
siat sempre Maria.

Issa est sa vittoria  
de ogni inimigu;  
de culpa o castigu  
nd'isburrat s'istoria  
e poi a sa gloria  
abberit s'intrada.

## Petizioni a Maria Santissima

O Maria, isposa e mama  
de su Deus 'Ostru e meu,  
sezis consolu e recreu  
de dogn'anima credente.  
Eccomi Bos so presente  
a Bois totu m'offerzo:  
lezi su coro e cherzo  
chi a Deus lu diedas.  
Bos prego chi m'ispozedas  
de ogni affettu terrenu;  
unu giardinu amenu  
de virtudes mi faghide;  
custa grazia cunzedide  
cuntentade custa brama,  
o Maria isposa e mama.

Isposa e mama Maria  
assistidemi,aggiudademi  
pietosa cunfortademi  
in dogni angustia e pena.  
De sa culpa sa cadena  
o truncade o isolvidemi  
premurosa difendidemi  
in dogni tentasciòne;  
dogni tribulazione

dae me siat lontana.  
Bois sezis soberana  
regnade in su coro meu,  
pro chi viva unidu a Deu  
cun Bois in cumpagnia  
isposa e mama, Maria!

O Maria, mama et isposa  
de s'amabile Signore,  
Bois cherides amore  
et amore a Bois do;  
cantu deo poto e so  
teneramente Bos amo  
e nuddh'atteru bramo  
che ischirebos amare.  
Oh! Si podia lograre  
custa grazia e tesoro  
sa mente, s'anima e coro  
sempre in Bois tenner dia.  
In tota sa vida mia  
mi siedas amorosa  
o Maria, mama et isposa!

O Maria isposa e mama  
cara a Deus Criadore,  
cara a Deus Redentore  
cara a s'Ispiritu Santu.

Gia chî sezis cara tantu  
a tota sa Trinitade  
eo cun umilidade  
cara Bos giamo, amada.  
Sezis ricca e adornada  
de ogni donu e virtude:  
dademi vida e salute  
cun donos celestiales:  
sun disizos filiales  
de chie meda Bos ama  
o Maria, isposa e mama.



## **Ave de su mare istella**

Ave, de su mare istella  
de Deus mama dignissima,  
sempre Virgine purissima  
de su chelu porta bella.

Cun cudd' Ave riverente  
s' Anghelu ti saludesit  
et Eva in Ave giambesit  
da nos paghe permanente.

Pònenos in libertade,  
sa zeghidade allontana;  
da ogni male nos sana  
da nos vida e santidade.

Mùstradi chi nos ses mama,  
giàghi in Te s'est incarnadu  
Cuddu ch'est pro nois nadu,  
intende chie lu giama.

O Virgine singulare  
sa pius mite inter totu  
ogni disizu, ogni votu  
pro te potemus lograre.

Vida santa e santa morte  
cun Gesùs pro te fattemus  
e de Lu ider gosemus  
totu in sa celeste corte.

Sa limba, coro e memoria  
diant cun sinzeridade,  
a tota sa Trinitade  
onore, laude e gloria.

## Nostra Segnora de Bonu Camminu

Giaich'in sa celeste altura  
sezis che sole divinu  
dadenos Virgine pura  
su 'Ostru santu camminu.

Su camminu e vera ghia  
dade o Virgine sagrada,  
giaichì sezis avvocada  
de s'afflitta cristiania  
in s'eterna monarchia  
Bos adorat de contìnu!

De s'immensa Trinitade  
sende Bois incoronada  
Segnora sezis giamada  
in dogni nezzessidàde  
a s'umana zeghidàde  
siades nòrte mattutinu.

Bos hat tantu sublimadu  
sas tres personas divinas  
chi subra de sas reinas  
prim'imperiu Bos hant dadu  
pro chi bos hant coronadu  
pro cunsensu unu e trìnu.

Cun sas grazias chi tenides  
Bos hant fatt' unich'istella  
tantu luminosa e bella  
chi che pare non connoschides  
e gai non defendides  
de cudd'infernale sinu!

Donu e grazia singolare  
tenides cun excellènzia  
chi sa divina essènzia  
risolvindesi incarnare  
si cherfisit inserrare  
in su 'Ostru puru sinu.

Sezis fiza giuntamente  
e mama e sua isposa  
ordinesit cale cosa  
Deus eternu onnipotente:  
a Bois mira tanta zente  
cale ispiju cristallinu.

Sias in terra o pur' in mare  
totu sunt iscaminados  
sende in Bois cunfidèntes  
non podent perigulare  
sempre Bos deven'invocare  
donzi aflittu e pellegrinu.

Bos prestant obbedienza  
cuddos battoro elemèntos  
e sos Bostros pensamentos  
osservant cun diligénzia  
contra Bois non hat potenzia  
su dragone serpentinu.

Bos pedint auditóriu  
sos divotos e divotas  
cun cuddas animas totas  
chi patint in purgadoriu  
sezis in su consistóriu  
cale rosa in su giardinu!

O colùнна fabricada  
de celeste fogu e nue  
pro dare lughe a totù  
et a sa plebe seberada  
chi non erret sa die  
de su piùs altu destìnu.

Nave rigida e ghiada  
de s'Ispiritu Divinu  
ùbe donzi pellegrinu  
tenet segura passada  
a sa parte disizada  
de su celeste giardinu!

Universale avvocada  
de afflittos oradores  
pro fagher cumprensore  
de sa celeste moràda  
valente suave dotada  
de donzi donu divinu.

Bidu chi podides tantu  
Signora, dade sa manu,  
reparade su cristianu  
cun cussu celeste mantu  
non olvidedes su piantu  
de su popolu mischinu.

Celestiale splendore  
astru ermòsu singulàre  
lumbrera azzésa pro dare  
lughe a su peccadore  
chi de sa culpa in s'amore  
t'appressat foras de tìnu.

Aurora rutilànte  
chi de sa morte in sas umbras  
cun bivos rajos adumbras  
su mortale caminànte  
pro confunder s'arrogante  
orgògliu luciferinu!

Mistica columba ermosa  
chi sos diluvios serresit  
et in bucca nos portesit  
signos de paghe amorosa  
de sa terra deliziosa  
su più candidu giardinu!

Iride de ermosos colores  
nùnziau de felzzidade  
àrra de eterna amistàde  
inter Deus e peccadores  
e de sos dolores nostros  
consol'unicu e continu.

Nobilissima Prinzesa  
Reina de sas alturas  
chi sas umanas criaduras  
incamminat cun destresa  
succurride a sa fracchessa  
de donzi viante mischinu.

Mama e Virgine sagrada  
refugiu de sos peccadores  
allargade sos favores  
a donz'anima affannada  
pro no esser infettata  
de alimentu piberinu.

Brillante nòrte divinu  
carta de seguridade  
bonu camminu nos dade  
Reina de bonu camminu!



## **A Maria, de maju dulce reina**

O prinzesa divina  
de sos coros allegrìa,  
prega pro nois Maria,  
de maju dulce reina.

In su mese de sos fiores  
Tue cumpàris maestosa,  
et ispàrghes dignitosa  
de virtude sos odores,  
pro chi totu sos favores  
Ti dat sa manu divina.

In custu mese sagràdu,  
ses Maria veneràda  
de s'anima tribulàda,  
de su populu affannàdu,  
portu in tronu sublimàdu  
ti fàghen de grazia mina.

Si de grazias tesorèra  
ses Maria pro eccellenzia,  
ses in maju a preferenzia  
de favores dispensèra,  
reina de primavera  
fatta cun arte divina.

Maria a tie clamamus  
cun costante devozione,  
in sa dura tentassione  
s'azzùdu tou imploramus,  
e liberanos pregàmus  
de s'infernale ruina.

Tue ses mama de allegria  
de s'afflittu peccadore,  
si ti nàrant cun amore  
Deus Ti sàlvet Maria,  
ottenide sa gloria  
e sa clemenzia divina.

Si gèmet su cristianu  
in angustias et affannos,  
Tue a pizzinnos e mannos  
istendes sa materna manu,  
e liberanos fittiànu  
de cudd'ira serpentina.

O mese privilegiàdu  
su piùs vagu e piùs amenu,  
de su fiore nazzarènu  
de sa mama innamoradu,  
de sos chelos adornàda  
cun esultanzia continua.

Ses Maria figuràda  
in sa rosa purpurina,  
pro modestia continua  
ses sa viola dedicàda,  
ses de lizzos adornàda  
pro puresa peregrina.

O Reina coronàda  
de sos fiore piùs elettos,  
cun càntigos e fiorettos  
ses in maju veneràda,  
Santa Mama immaculàda  
ampàra s'alma meschina

Cando infine s'ultim'ora  
t'invocat su peccadore,  
tue cun maternu amore  
aggiùdes bella Signora,  
e grazias tue implòra  
de sa zittade divina.

## Isposaliziu de Nostra Signora

Cun festiva galanìa  
esultat su mundu tantu,  
pro chi cun Zuseppe santu  
est isposàda Maria.

In cudd'Olimpu sagràdu  
in cudda celeste isfèra,  
cun soberàna manèra  
istetìsit decretàdu  
dare isposu seberàdu  
a sa pius fecunda Lia.

Applicant pro cuss'onore  
su Babbu s'onnipotenzia,  
su Fizu sa Sapienzia,  
s'Ispiritu Santu s'amore,  
cuncurrinde a su favore  
su chelu cun melodìa.

Cun ammirabile esemplu  
Maria ossequiosa  
cale Rachele ermosa  
in cuddu sagràdu templu,  
ispèttat su cumplimentu  
de sa mézus profezia.

Gai Zuseppe assistìdu  
de peregrinos onores,  
pro bìder tales favores  
a su templu est accudìdu,  
et istèsit elegìdu  
a tanta soberanìa.

Sa Fiza, su Babbu Eternu,  
cun Zuseppe hat isposàdu  
et in dote l'hat donadu  
de su mundu su guvernu  
cun podere sempiternu  
subra dogni monarchìa.

De sa purissima isposa  
de s'Ispiridu Santu,  
istèsit Zuseppe santu  
cun grazia meravigliosa,  
isposu chi est una cosa  
de s'alta sabidorìa.

Totu pensamentu umanu  
ammirèsit tantu onore,  
celebrèsit su favore  
dogni làdu soberànu;  
de su infernale tirànu  
difendìde s'alma mia.

## O anima dolorosa

O anima dolorosa  
chi ses priva de cuntentu,  
semper heppas in pensamentu  
sa reina de sa rosa.

Si de peccados dolentes  
tue has fattu unu sumariu,  
nara allegramente  
su Santissimu Rosariu;  
su mundu traversariu  
non podet nesciuna cosa  
pro chi li paret contrariu  
a sa reina de sa rosa.

Si cheres alma conòscher  
de pronta allegria  
nara chimbe *Pater Noster*  
e chimbanta *Ave Marias*,  
ponedi in sa cunfrarìa  
servendela in dogni cosa,  
ti dèt fagher sempre ghia  
sa reina de sa rosa.

Servimus sa Virgine pura,  
Virgine Santa immaculada  
pius de ogni creadura,  
defensora et avocada  
nostra est Maria sagrada  
de Christos mama et isposa,  
in sempiternu est giamada sa  
reina de sa rosa.

Ai custa saludàit  
s' anghelu cun grande onore,  
custa Virgine visitait  
a sa cadrea gloriosa  
lassende in terra pro ghia  
sa reina de sa rosa.

Sa Virgine fuit in piantu  
pro esser in terra frimmada,  
de su Ispiritu Santu  
stetit consolada,  
sa morte sua annotàda  
stetit miraculosa,  
pro esser a su chelu asciada  
sa reina de sa rosa.

Su Fizu la incoronait  
de perlas cristallinas,  
e posca l'intitulàit  
subra dogni femina  
de chelu e terra reina,  
pedra fina e preziosa,  
siat de nois meighina  
sa reina de sa rosa.

O Virgine sola cumprida  
piena de benignidade,  
cun tantu amore infinida  
e perfetta castidade,  
in dognuna infirmitade  
de sa vida traballosa  
sempre pro nois pregade  
Virgine Santa de sa rosa.



## **In sos chelos coronada**

In sos chelos coronada  
suprema Reina e Segnora,  
siades nostra interzessora  
Virgine pura immaculada.

Sende su generu umanu  
de Adam pro su peccadu  
isclavu digrasciadu  
de s'infemale tiranu,  
pro cunsizu soberanu  
fizis de issu preservada.

Sutta de sos pés calcadu  
hazis s'antigu serpente,  
cussu velenosu dente  
no hat a Bois infettadu,  
hazis de issu triunfadu  
luego appena ingendrada.

Domo netta prevenida  
pro s'incarnada Sapienzia  
ch'hat sa divina potenzia  
cun antas sette guarnida,  
de ogni grascia arricchida  
de donos ammobbigliada.

Turre forte inespugnabile  
cun formidandu armamentu,  
a ogni macchina et istrumentu  
de s'inferru impenetrabile,  
ortu serradu ammirabile,  
funtana bene sellada.

Ca de culpa originale  
esenta semper stetti  
et illesu cunservestis  
su candore virginale,  
mama e Virgine chen'eguale  
sezis in mundu ammirada.

Istella giara e brillante  
pro su mundu tenebrosu,  
in su mare burrascosu  
ghia a dogni navigante,  
àncora firma e costante  
de sa zente angustiada.

Portu de salvassiòne,  
mistica arca de Noè  
chi pro su divinu Re  
fistis prima abbitasciòne,  
accoglide ogni persone  
chi Bos giamat cunfidada.

De Deus Babbu fiza ermosa,  
de sa Trinitade templu,  
mama de mirandu esemplu,  
de Deus fiza venturosa,  
de su Paraclitu isposa  
unica, eletta et amada.

Hat cum Bois divididu  
Fizu 'Ostru su cuidadu  
pro chi siat sollevadu  
su peccadore affliggidu,  
donadenos chenz'olvidu  
cumpassiva una mirada.

Virgine 'e grascia piena,  
de serafinos onore,  
refugiu a su peccadore,  
de piedade ricca vena,  
truncadenos sa cadena  
de sa culpa inveterada.

Pro cuddu donu ispeciàle  
cun chi Deus Bos esaltesit  
cando a Bois preservesit  
de sa culpa originale,  
grascia pedimus finale,  
morte sant'et aggiustada.

Fizos de Eva disterrados  
in cust' adde 'e piantu,  
basciu su maternu mantu  
clamamus esser osservados  
e dai Bois iscortados  
a sa celeste posada.

Siades Nostra interzessora,  
Virgine pura immaculada.

## Pro Nostra Signora Assunta in chelu

Die de summa allegria,  
die santa prinzipale,  
a su chelu imperiale  
oe est asciada Maria.

Die festivu giocundu  
chi tottu su mundu bràma,  
Maria, Virgine, Mama,  
oe hat lassàdu su mundu,  
giubilu chena segundu  
gòsat dogni gerarchia.

Die de felizidade,  
die privilegiàda,  
prinzipesa immaculada  
asciad' a s'alta zittàde,  
cun pòmpa e solennidade,  
cun sonos de melodia.

Tottu cun grande disìzzu  
sunu sos mortales tristos,  
pro chi sa Mama de Cristos  
intrad' in s'altu cunsizzu,  
pro regnare cun su Fizu  
in suprema Monarchia.

Sa cadrèa li est donàda  
cale vera Imperadora,  
anima e corpus ancòra  
in chelu est collocàda,  
chie l'hat incoronàda  
est su veru Messia.

Sa Reina de sos chelos  
oe ch'est in paradisu,  
totu li fàghen su risu  
umpàre cun sos anghèlos,  
e si 'nde lèant sos vèlos  
sos santos de allegria.

O Assunta gloriosa  
ses in chelu collocàda,  
o mama nostra avvocada  
aggiùanos in dogni cosa,  
chi ses de Deus Isposa,  
dànos de Gesùs sa via.

## Sa celeste gerarchia

Sa celeste gerarchia  
faghet festa sublimada,  
hoe est a sos chelos asciada  
in alma e corpus Maria.

Hoe sos coros celestes  
faghent festa senz'uguale,  
sos mortales et celestes  
cun su chelu imperiale  
pro sa prinza reale  
mustrant grande galania.

Hoe s'empireu chelu  
sentit grande regozisu,  
Maria chena rezelu  
hat cumplidu su disizu  
de regnare cun su fizu  
in eterna cumpagnia.

Asciad'hoe triunfante  
a su Chelu imperiale,  
pius de sole radiante  
intrat s'infanta reale,  
in sa corte celestiale  
regnat cun summa allegria.

Inue cun galania  
La servene totu sos santos,  
cun profunda cortesia  
la venerant totu cantos,  
innos, mutettes e cantos  
li cantant totu a porfia.

Sos anghelos tot' unidos  
cun grande pompa et impresa  
da gala si sunt bestidos  
pro incontrare sa prinzesa  
cun tale modu e destresa  
e profunda cortesia.

Totu allegros e cuntentos  
cun musica cunzertada  
lassant sublimes assentos  
pro fagher festa a s' intrada,  
asciada tant' accumpagnada  
de illustre compagnia.

Hoe su Babb' Eternu  
La rizevit cun amore  
causend' ai cudd' inferru  
ispantu mannu e terrore  
cun immensu risplendere  
e cun summa melodia.



Hoe su fizu et isposu  
La corteggiat cun grandesa  
e li dat assentu onrosu  
cale nobile prinzesa,  
sos anghelos cun destresa  
la servint cun galania.

In sos Chelos sublimada  
regnat s'infanta reale  
e pro sempre collocada  
in su tronu imperiale,  
cale infanta principale  
regnat cudda monarchia.

Già chi orfanos restamus  
In custa presone oscura,  
in te Reina confidamus  
protettora de s'altura,  
mira ch'ogni creatura  
non restet cun agonia.

Hoe est a sos Chelos asciada  
in alma e corpus Maria.

## Cal'est custa Signora

Cal'est custa Signora  
simile a s'aurora  
ch'asciad in Chelu in carru triunfante?

Est de su Babbu Eternu  
s'unica fizza eletta,  
concepida chena mancia originale  
pro smaccu de s'inferru;  
chena neu concepida  
contra su serpe barbaru infernale,  
est sa pius perfetta;  
virgine pura e netta  
pro unione divina  
de su Ispiritu Santu isposa amante.

Virgine pura e bella  
dae totus conoschida,  
chi sutta de sos pes portat sa luna,  
coronada de istellas,  
de fiores guarnessida;  
pro sos fizzas de Adam dicia e fortuna;  
su serpente attrividu,  
chi trunchesit sa vida  
de Adam e de Eva in una  
listat sutta sos pes mortu e tremante!

Totu sas gerarchias  
dae su Chelu intonant  
pienas 'e meraviglias et ispantu;  
chelu e terra resonant,  
narant sas allegrias:  
«Fizzos d'Eva lassade su piantu.  
Oe sas tres personas  
formana tres coronas  
pro coronare Maria,  
e non sun fiore de sa terra errante».

Una de onnipotenzia,  
ch'est corona immortale,  
Deus Babbu li donat in onore;  
atera de sapienzia  
su Fizzu celestiale;  
ei sa terza corona est de amore,  
meighina totale  
subra de donzi male,  
pro chi su peccadore  
incontret a Maria a dogni istante.

Cust'est cudda femmina  
chi dadu hat a cumbatter  
a Lusbet, et a tottu s'Acheronte;  
de chelu e terra Reina?  
Custa est, e no ater,

chi l'hat postu su pè  
subra su fronte:  
su virginale latte  
chi su mundu riscatte',  
in su Calvariu monte  
hat dadu fizza  
e mamma a Deus infante!

Cando dae su niente  
su mundu formaiat  
cun sas divinas boghes soberanas,  
su Deus onnipotente  
cun d'unu solu «Fiat»  
creesit chelos, mares e funtanas;  
Maria fit presente  
et in totu assistente;  
si canto cosa umana  
s'iscurtet de David s'arpa sonante.

## Gosos de Nostra Segnora de mes'Austu

Chelu e terra a porfia  
cun gloria podent cantare  
pro chi est asciada a regnare  
a s'altu chelu Maria.

S'allegret sa Trinitade  
de sa Fiza, Mama, Isposa,  
sa summa patria gloriosa  
celebret festividade  
cantet ogni Podestade  
ogni Tronu e Gerarchia.

*Pro chi est asciada...*

S'allegrent sos serafinos  
sos Anghelos totu cantos  
s'allegrent totu sos santos  
cun totu sos cherubinos  
de sos onores divinos  
forment dulce melodia.

*Pro chi est asciada ...*

Die de felizidade  
die privilegia  
sa reina immaculada  
asciad'a s'alta zittade  
cun pompa e solennidade  
de celeste melodia.

*Pro chi est asciada ...*

die festivu e giocundu  
de mannu cuntentu e fama  
Maria Virgine e Mama  
hoe hat lassadu su mundu  
giubilu chena sicundu  
Santa in d'ogni gerarchia.

*Pro chi est asciada ...*

S'Ecclesia santa festosa  
formet innos de cuntentu  
s'arca de su Testamentu  
in chelu intres maestosa  
cale istella luminosa  
in anima e corpus bia.

*Pro chi est asciada ...*

Tale apusentu l'ha dadu  
cale summa Imperadora  
anima e corpus ancora  
a sos chelos hat boladu  
orfanos non hat lassadu  
in sa valle de agonia.

*Pro chi est asciada ...*

Virgine glorificada  
in costanzia e candidesa  
Reina nostra e prinzesa  
de gloria totu adornada  
esaltade Cungregadas  
cun celestiale armonia.

*Pro chi est asciada ...*

Cun su Fizu est unida  
cun unione giocunda  
a sa patria segunda  
pro sempre l'hat trasferida  
oe de Sole est bestia  
regnat cun summa allegria.

*Pro chi est asciada ...*

Faghent festa sos Cristianos  
chena perùnu rezelu  
pustis la faghent in chelu  
sos Anghelos meda urfànos  
cun cantigos soberanos  
E suave melodia.

*Pro chi est asciada ...*

Sos peccadores ancora  
cun sos giustos fettant festa  
ch'in Chelu  
intrat manifesta  
s'Avvocada e Protettora  
cale brillante Aurora  
de ogni mortale ghia.

*Pro chi est asciada ...*

Sos Bostros servos Segnora  
tenidelos in memoria  
et in sa celeste gloria  
siade nos protettora  
pro s'anima peccadora  
chi cundennada no siat.

*Pro chi est asciada ...*



Celebrade festividade  
d'ogni umana criadura  
ch'in chelu tenet segura  
sa Mama de piedade  
mortales, solennizzade  
custa festa de allegria.

*Pro chi est asciada ...*

Pustis ch'orfanos restamus  
in custa presone oscura  
in Tie Reina cunfidamus  
protettora de s'altura  
faghe ch'ogni criadura  
no restet in agonia.

*Pro chi est asciada ...*

Dae hoe no pius fastizu  
tottu sos mortales tristos  
pro chi sa Mama de Cristos  
asciad'a s'altu Cunsizu  
pro regnare cun su Fizu  
in suprema monarchia.

*Pro chi est asciada ...*

Mama de eterna memoria  
pro tanta dicia accansada  
de custa vida penada  
accansade nos vittoria  
partecipende in sa gloria  
sa 'Ostra soberania.

*Pro chi est asciada ...*

Chelu e terra a porfia  
cun gloria podent cantare  
pro chi est asciada a regnare  
a s'altu Chelu Maria.

## Pro su Rosariu cantadu de Maria

Contra sa malignidade  
de su comune avversariu,  
Reina de su Rosariu  
sos devotos amparade.

*Sos misterios gaudiosos*

Pro cuddu gosu c'apezis  
cun s'angelica imbasciàda,  
cando in totu seberàda  
pro Mama de Deus istezis,  
cun su cunsensu chi dezis  
a s'eterna voluntade.

Pro s'amorosa visita  
cando santa Elisabetta  
de s'Ispiritu replètta  
Bos giamèsit beneitta,  
connoschènde sa infinita  
Incarnàda Magestade.

Pro cuddu partu diciosu  
ch'apèzis chena dolore,  
parturinde su Signore  
cun inefabile gosu,  
sola, cun solu s'isposu,  
riccos in sa povertade.

Pro cuddu gosu sobràdu  
chi tenzèzis in su coro,  
mirènde cuddu tesoro  
chi a Fizu Ostru han donàdu  
sos Res chi l'han'adoràdu  
cun profunda umilidade.

Pro cuddu grande cunsòlu  
chi su Ninnu Bos hat dàdu  
pustis de lu haer chircàdu  
tres dies cun pena e dolu,  
cando inter Dottores, solu,  
dispùtat sa veridade.

*Sos misterios dolorosos*

Pro cudda grande agonia  
chi sentèzis e dolore,  
cando de sàmben suòre,  
in s'ortu Gesùs isparghiat,  
ca sa morte ispetaiat,  
cun tanta impiedade.

Pro cuddu dolu sobràdu  
chi apèzis Virgine trista,  
cun sa lamentosa vista  
de unu Deus flagellàdu,  
a sa columna ligàdu  
chena piedade.

Pro sa sensibile pena  
chi apèzis santa Matrona,  
pro s'ispinòsa corona  
chi oscurèsit sa serena  
càra de bellesa piena,  
chi respirat santidade.

Pro cuddu assùstu tremendu  
chi Bos tocchèsit su coro,  
cando Fizzu 'Ostru 'e oro  
passat in tantu istruèndhu  
cun cuddu pesu istupèndu  
de sa rughe, in sa zittade.

Pro cudda crudele ispada  
chi s'alma Bos trapassèsit  
cando a Gesùs isclavèsit  
sa Giudea depravàda,  
colmende cun sa lanzàda  
sa barbara crudelidade.

Pro cuddu forte lamentu  
chi fattèzis dolorosa,  
cando in sos brazzos  
penosa isclavàdu l'hazis tentu,  
mirende su chelu attentu  
tanta rara piedade.

*Sos misteros gloriosos*

Pro cudda suprema glòria  
chi apèzis senza uguale,  
resuscitende immortale  
coronàdu de vittoria,  
fattènde Gesus notoria  
sa sua divinidade.

Pro cudda consolazione  
chi apèzis Virgine pura,  
Gesùs bolènde a s'altura  
in celeste processione,  
dada sa benediscione  
cun meda solennidade.

Pro cudda allegria summa  
chi s'alma Ostra sentèsit  
cando Bos subrabenzèsit  
s'Ave de divina puma,  
chi sos coros totu allùmmat  
in fogu de caridade.

Pro cudd'allegria pregùnta  
chi sos anghelos fattèsin,  
cand'asciare Bos bidèsin  
subra tot'issos Assunta,  
suavemente defunta  
pro viver s'eternidade.

Pro su giubilu estremadu  
chi gosades in eternu,  
cun su assolutu guvernu  
chi Deus Bos hat donàdu,  
cando Bos hat coronàdu  
subra dogni potestade.

## Orascione a sa Madonna

Vergine gloriosissima e clementissima, Mama de Deus, Maria. Ecco prostrados a sos santissimos pes Bostros, a nois umiles servidores Bostros, indignos devotos Bostros: Bos pregamus cun su pius profundu 'e su coro nostru a Bos dignare de rezire custas debiles laudes e beneisciones nostras chi Bos offerimus in custa santa novena cunsegrada a su felice momentu de su santissimu Naschimentu 'Ostru in su mundu, intendende de las accompagnare ai cuddos fervorosos cantigos chi Bos donan sos Anghelos e Santos in su chelu.

In premiu de tantu Bos supplicamus de nos ottenner sa grascia chi, comente 'Ois naschezis in custu mundu prò esser sa Mama e Deus, gasie nois resuscitemus a sa grascia divina pro esser fìzos Bostros, de modu chi amendebos, pustis de Deus, pius de ogni cosa criada e servendebos cun totta fidelidade in terra, podemus benner una die a Bos laudare sempre in su chelu.



Et pro como permittide, o grande Avvocada nostra, chi Bos veneremus et invochemus cun su saludu de s'Arcangelu Gabriele, prò sa devota memoria de sos dughentos-settanta dies chi istezis inserrada in su sinu fortunadu de sa mama 'Ostra, Sant' Anna. Siat edducas beneittu, o Maria, cuddu felicissimu istante ch'istezis cunzepida chènna mància originàle.



## **Preghiere del giorno e della notte**



## **Su Babbu Nostru**

Babbu nostru,  
chi ses in sos chelos,  
siat santificadu su nomene Tou,  
benzat a nois su regnu Tou,  
fatta siat sa voluntade Tua  
comente in su chelu, gai in sa terra.

Su pane nostru de onzi die,  
dona nois oe,  
e perdona a nois sos peccados nostros,  
comente nos ateros perdonaus  
a sos depidores nostros;  
no permittas de ruere in sa tentassione:  
e liberanos de su male.  
Amen in Gesus

## **O Babbu soberanu**

O Babbu soberanu  
ch'in sos chelos istades  
e semper nos mirades  
chun amore.

O supremu Signore,  
su nomen Ostru  
santu siat esaltadu tantu  
in chelu et in terra.

Semus sempre in gherra,  
benzat su regnu 'Ostru  
chi est puru regnu nostru 'e santidade.  
Sa 'Ostra voluntade  
faghimus dozzilmente  
in sa terra comente  
est fatta in chelu.

Como chin tantu zelu  
su pan'e cada die  
dimandamus a chie  
est Babbu onu.

Nois damus perdonu  
a sos nemicos nostros,  
Bois sos peccados nostros perdonade.

Tenide piedade  
de sos fijos tentados,  
continuo insidiados nos sentimus.  
Dae su male pedimus  
de esser liberados  
et in su chelu giamados  
a sa gloria.  
Amen.

## Creo in unu Deus

Eo credo in unu Deus,  
eternu babbu increadu,  
de su mundu formadu su creadore.

Creo in Gesùs,  
segnore e salvadore meu,  
omine e veru Deu,  
Verbu incarnadu,  
fizu unicu,  
ch'est nadu dae Babbu eternamente,  
pustis temporalmente dae Maria.

Ipsa cun primasìa  
subra d'ogni creatura  
mama est virgine pura  
pro alta virtude.

Creo chi pro sa salute  
de custu mundu  
ingratu sutta Pontiu Pilatu  
Gesùs patesit.

Pro nois s'umiliesit  
poveritu, affrentadu,  
feridu e inclavadu  
in rughe dura.



Et mortu, et in sepultura;  
e chi pustis da mie  
est a sa terza die  
resuscitadu.

Et a sos chelos asciadu,  
ue hat gloria perfetta,  
sezidu a sa deretta  
de Babbu sou.

Chi da mie de nou  
a giudiciu det benner:  
sos malos hant a tenner  
pena in s' infernu.

Sos bonos premiu eternu:  
ecco sa differenza  
segundu sa sententia  
de gosu o piantu.

Creo in su Ispiritu Santu  
e in Babbu e Fizu Deu,  
veru Signore meu,  
unu in essenzia,  
e trinu in subsistenza  
de distintas personas,  
onnipotentes, bonas  
totu ugualmente.

Ti creo giuntamente,  
santa Ecclesia catolica,  
mama nostra apostolica et universale.

Creo chi b'hapat tale  
comunione de santos,  
chi si unan totu cantos  
in fide et amore,  
e cun su Redentore  
sos meritos insoro  
formen pro nois tesoro de caridade.

Creo cun seguridade perdonu de peccados,  
si issos sun detestados devidamente.

E creo finalmente  
chi hapo a resuscitare  
e chi de me hapo a dare contos a Deu:  
chi pro reposu meu  
sa gloria si preparat,  
vida eterna si narat,  
si vivo bene;  
cun s'Ecclesia tambene  
creo cantu est credibile,  
ca est verace e infallibile Deus,  
chi l'hat nadu.

Deus meu,  
confido in sa 'Ostra piedade  
e summa bonidade,  
seguru ispettu  
chi si eo mi peneto  
de cantu hapo peccadu  
hap'a esser perdonadu  
interamente.

Confido giuntamente  
chi m'hazis a salvare,  
si tratto de osservare sa lege santa.

Sa confidentia est meda  
ca est promissa infallibile,  
divina et indefettibile,  
chi m'hazis fattu,  
e Cristos satisfattu  
hat pro chi mi salvare,  
ne li mancat podere  
ne voluntade.

Gai de sa piedade  
et onnipotentia 'Ostra  
sa grascia e gloria nostra  
totu ispettamus.

De coro Bos amamus,  
summu bene ineffabile,  
ca sezis pius amabile  
d'ogni creatura,  
et amamus cun ternura  
pro esser precettu 'Ostru  
a su prossimu nostru,  
comente a nois.

Eo l'amo pro Bois,  
bonidade constante,  
amabile et amante,  
e mi protesto  
chi deveras detesto  
sas culpas chi fattesi,  
solu pro chi offendesi  
su summu bene,  
Deus, dignu de amore,  
de laude e reverentia,  
de onore e de obedientia  
subra ogni cosa.

E proponzo tambene  
de mai pius peccare  
pro no minispressiare  
a Bois, Signore.

## **Perdonu, Deus meu**

Perdonu, Deus meu,  
cunfesso, happe peccadu,  
cuntrittu et umiliadu  
pedo piedade.

Eterna bonidade,  
soberana clemenzia,  
a sa 'Ostra presenza  
sa culpa aburro.

Umile a sos pes curro,  
miseru peccadore,  
cun sinzeru dolore  
e pianghende.

So inculpadu, nende:  
«Meda bos happe offesu!».  
Lu tenzo a grande pesu,  
o Deus meu.

De milli culpas reu  
connosco happe erradu  
et happe maltrattadu  
su Signore.

Ma Bois, Salvatore  
misericordiosu,  
mi dades, amorosu,  
s'isperanzia.

E tenzo cunfidenza  
chi chena m'appartare  
mi dezis perdonare  
interamente.

Protesto in su presente  
lassare s'antigu usu,  
de no peccare piusu eo proponzo.

A Bostros pes mi ponzo cale prodigu fizu,  
finas chi su disizzu  
happo a lograre.

Ispetto, perdonare  
che a sa Maddalena  
mi dezis, e a sa pena mi preparo.

Indignu mi declaro  
de tenner su perdonu ma Bois,  
Deus bonu, mi lu nades:  
chi grazia e chelu dades,  
pustis fatta cumplida sa pena giusta,  
devida a su peccadu.

Dep'esser riscattadu  
in ogni operassione,  
da ogni occasione  
happo a fuire.

Depo semper sighire  
sa 'Ostra santa legge,  
non cale fia,  
che eregge chena tinu.

Gesùs, fizu divinu,  
so rutu, assistidemi,  
dade sa manu,  
benide a mi nde asciare.

Su samben applicare  
podides derramadu,  
chi pro me hazis dadu  
in d'una rughe.

Siat Maria lughe,  
piedade e potenza,  
in sa 'Ostra presenza a m'assistire.

Cherzat esaudire  
cun anghelos e santos  
cantos regnant,  
cantos, in sa gloria.

Amen.

## **Mi raccumando a Deus**

Mi raccumando a Deus  
a sa gloriosa Virgine Maria  
a s'Arcangelu Santu Micheli  
a Santu Giuanne Battista  
a sos batoro Evangelistas  
e a totus sos Santos de su Chelu  
chi benzat a mi donare:  
comunione, penitenzia et ozzu santu  
in nomene de su Babbu de su Fizzu  
e de s'Ispiritu Santu.  
Amen.



**Avanza avanza su pe' meu**

Avanza avanza su pe' meu  
a domo 'e Deus  
a domo 'e Cristu  
a Bois amo et a Bois chisco.

## Preghiera per la notte

Su lettu meu est de batoro contones  
batoro anghelos si bi ponent  
duos in pes e duos in cabita  
nostra Signora a costazu m'istat;  
e mi narat: "Drommi e reposa,  
no happas paura de mala cosa,  
no appas paura de malu fine".  
s'anghelu Serafinu  
s'anghelu biancu  
s'Ispiritu Santu  
sa Virgine Maria  
totu siant in cumpagnia mia.  
Anghelu de Deu  
su custodiu meu  
custa nott'illuminami,  
abbaida e difende a mie  
ca deo m'incumando a tie.

## Orascione a Deus

Deus e Signore meu, prostrados denànti de sa magestade 'Ostra soberana, cun totu s'esser nostru, animas et coros, Bos adoramus, cunfessamus e beneighimus, laudamus e glorificamus e Bos riconnoschìmus prò su Deus e Signore Nostru, in Bois creimus, e creimus firmamente in totu sos misterios de sa santa fide cattolica in sa cale cherimus vivere e morrer.

In Bois cunfidamus, e dae 'Ois aisettamus nos tezis perdonare totu sos peccados nostros, nos tezis dare sa grascia Ostra, sa perseveranzia in issa, e sa gloria chi tenides promittida a sos chi persevèran in su santu amore 'Ostru. A Bois amamus subra totu sas cosas, prò sa bonidade 'Ostra infinita, a Bois grascias infinitas pro totu sos beneficios chi nos azis fattu et istades fattendenos sempre.

A Bois cunfessamus sa summa ingratitude nostra, e totu sas culpas e sos peccados nostros, e de totu Bos dimandhamus perdonu. Nos pesat Deus bonu de Bos aer offesu pro esser Bois chie sezis. Nos pesat ancora proite sezis su Deus nostru infinitamente 'onu e di-

gnu de essere amadu subra totu sas cosas; proponimus firmamente, assistidos cun sa grascia 'Ostra de mai pius peccare et appartarenos dae tottu sas ocasiones de Bos offender, cunfessarenos e fagher penitenzia de sos peccados nostros e procurare in totu de Bos servire et aggradare.

Cunfìdamus in Bois, Signore, chi prò s'infinita misericordia 'Ostra nos tezis perdonare e nos tezis dare sos ausilios Bostros, proite perseverende in sa grascia 'Ostra godimus in sa gloria eternamente. Perdonadenos, Signore pro chi cun s'anima limpia e pura, invochemus e laudemus a Maria Santissima, Mama 'Ostra e Signora nostra, et acansemus pro sa intercessione sua, cantu in custa novena dimandhamus, essende pro mazzore onore e gloria Ostra e profettu de s'anima nostra.

Amen

